

Eluned Morgan AS/MS
Y Gweinidog Iechyd a Gwasanaethau Cymdeithasol
Minister for Health and Social Services



Llywodraeth Cymru
Welsh Government

Ein cyf: MA-EM-1104-23

Peredur Owen Griffiths AS
Cadeirydd,
Y Pwyllgor Cyllid

5 Mai 2023

Annwyl Peredur

Cyfeiriaf at adroddiad y Pwyllgor Cyllid a gyhoeddwyd ar 25 Ebrill a oedd yn cynnwys ei ganfyddiadau a'i argymhellion fel rhan o'r gwaith craffu Cyfnod 1 ar Fil Caffael y Gwasanaeth Iechyd (Cymru).

Hoffwn ddiolch i'r Pwyllgor am ei waith craffu ar y Bil ac am y dogfennau ategol a luniwyd.

Rwyf wedi ystyried yr adroddiad yn ofalus ac wedi nodi, yn Atodiad A, fy ymatebion i argymhellion y Pwyllgor cyn y Ddadl Cyfnod 1 ar yr Egwyddorion Cyffredinol a gynhelir ar 9 Mai.

Yn gywir

Eluned Morgan AS/MS
Y Gweinidog Iechyd a Gwasanaethau Cymdeithasol
Minister for Health and Social Services

Bae Caerdydd • Cardiff Bay
Caerdydd • Cardiff
CF99 1SN

Canolfan Cyswllt Cyntaf / First Point of Contact Centre:
0300 0604400

Gohebiaeth.Eluned.Morgan@llyw.cymru
Correspondence.Eluned.Morgan@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

ATODIAD A

BIL CAFFAEL Y GWASANAETH IECHYD (CYMRU)

YMATEB LLYWODRAETH CYMRU I ADRODDIAD CRAFFU CYFNOD 1 Y
PWYLLGOR CYLLID, 25 EBRILL 2023.

Argymhelliad 1: Mae'r Pwyllgor yn argymhell bod Llywodraeth Cymru yn darparu asesiad o'r risgiau a'r effaith ariannol o gael dwy gyfundrefn wahanol ar gyfer caffael y gwasanaeth iechyd dros dro yng Nghymru a Lloegr

Ymateb: **DERBYN MEWN EGWYDDOR**

Ar adeg llunio'r Memorandwm Esboniadol a'r Asesiad Effaith Rheoleiddiol i gefnogi cyflwyno'r Bil, nid ystyriwyd y byddai'n ymarferol i geisio cynnal asesiad ariannol manwl llawn o'r gyfundrefn newydd arfaethedig ar gyfer caffael y gwasanaeth iechyd. Mae hyn oherwydd, heb wybod faint yn union o newidiadau fydd yn ofynnol i'r gweithdrefnau, trefniadau llywodraethu a chyfundrefnau caffael presennol o ganlyniad i'r Bil, a pha wasanaethau iechyd sydd o fewn cwmpas a'r ffordd y maent yn cael eu caffael rhwng y GIG ac awdurdodau lleol yng Nghymru ar hyn o bryd, nid yw'n bosibl mesur effaith ariannol y gyfundrefn newydd mewn modd cywir ac ystyrlon.

Felly, roedd yr wybodaeth yn y Memorandwm Esboniadol a'r Asesiad Effaith Rheoleiddiol yn cynnig yr 'amcangyfrif gorau' o effeithiau ariannol y Bil ac o gyflwyno cyfundrefn gaffael newydd ar gyfer gwasanaethau iechyd yng Nghymru, yn seiliedig ar y dystiolaeth a'r wybodaeth orau a oedd ar gael ar yr adeg benodol honno.

Ystyrir felly fod hyn hefyd yn berthnasol wrth geisio asesu'r risgiau a'r effeithiau ariannol sy'n gysylltiedig â chael dwy gyfundrefn wahanol ar gyfer caffael y gwasanaeth iechyd dros dro yng Nghymru a Lloegr.

Wrth nodi argymhelliad y Pwyllgor mewn perthynas â hyn, bydd fy swyddogion yn parhau i weithio gyda'r 'awdurdodau perthnasol' a'r rhanddeiliaid y bydd cyflwyno'r Bil yn effeithio arnynt, i ystyried a oes modd mesur mewn modd ystyrlon effaith cael dwy gyfundrefn wahanol ar gyfer caffael y gwasanaeth iechyd dros dro yng Nghymru a Lloegr. Sut bynnag, bydd fy swyddogion yn ceisio darparu'r dystiolaeth orau sydd ar gael a chymaint o wybodaeth ag sy'n ymarferol bosibl ar yr effeithiau ariannol a'u cyflwyno fel rhan o'n hymrwymiad i gynnal Asesiad Effaith Rheoleiddiol llawn ar gyfer rheoliadau'r dyfodol.

Argymhelliad 2: Mae'r Pwyllgor yn argymhell bod Llywodraeth Cymru yn darparu Asesiad Effaith Rheoleiddiol llawn a chadarn ar gyfer unrhyw reoliadau a wneir o ganlyniad i Fil Caffael y Gwasanaeth Iechyd (Cymru) a bod digon o amser yn cael ei ddarparu i ganiatáu i'r Senedd ystyried unrhyw oblygiadau ariannol cysylltiedig a fydd yn codi.

Ymateb: DERBYN

Yn dilyn yr ymateb uchod yn Argymhelliad 1 ac yn unol â'r gofynion o dan Reol Sefydlog 27 o 'Reolau Sefydlog Senedd Cymru' a'r polisi a nodir yng Nghod Asesiad Effaith Rheoleiddiol Gweinidogion Cymru ar gyfer Is-ddeddfwriaeth, rydym yn gwbl ymroddedig i gynnal Asesiad Effaith Rheoleiddiol, gan ddefnyddio'r dystiolaeth orau sydd ar gael i'w gynnwys mewn Memorandwm Esboniadol a fydd yn cyd-fynd â rheoliadau'r dyfodol.

Bydd y rheoliadau arfaethedig yn y dyfodol yn dilyn proses y 'weithdrefn gadarnhaol', gan ganiatáu yr amserlen briodol i'r Senedd ar gyfer ystyried y rheoliadau drafft a'r dogfennau ategol, gan gynnwys yr Asesiad Effaith Rheoleiddiol.

Argymhelliad 3: Mae'r Pwyllgor yn argymhell bod Llywodraeth Cymru yn darparu gwybodaeth am sut y bydd yn archwilio'r canlynol gyda rhanddeiliaid:

- ***amcangyfrif o'r costau ymglyfarwyddo a gweithredu i awdurdodau lleol a darparwyr gwasanaethau,***
- ***yr arbedion cost amcangyfrifedig i awdurdodau caffael, darparwyr a defnyddwyr gwasanaethau, a***
- ***chostau parhaus y gyfundrefn newydd.***

Ymateb: DERBYN MEWN EGWYDDOR

Fel yr amlinellir yn Argymhelliad 1 uchod, mae'r Memorandwm Esboniadol a'r Asesiad Effaith Rheoleiddiol a luniwyd wrth gyflwyno'r Bil yn nodi'r 'amcangyfrif gorau' o effeithiau ariannol y Bil.

Cydnabyddir ei bod yn debygol y bydd costau yn codi ar gyfer awdurdodau perthnasol (gan gynnwys awdurdodau lleol) a darparwyr gwasanaethau mewn perthynas ag ymglyfarwyddo â'r gyfundrefn gaffael newydd arfaethedig ar gyfer gwasanaethau iechyd, ac wrth barhau i'w gweithredu.

Fodd bynnag, gan nad yw'n hysbys beth fydd y costau hynny, mae'n anodd mesur effaith ariannol lawn y gyfundrefn newydd er mwyn darparu asesiad cywir o'r effeithiau ariannol ar hyn o bryd. Bydd dadansoddiad pellach o'r costau yn cael ei gynnal yn ystod y misoedd nesaf fel rhan o'r gwaith i ddatblygu manylion rheoliadau'r dyfodol, gan gynnwys mesurau i ddeall unrhyw arbedion cost a'r costau parhaus wrth weithredu'r gyfundrefn gaffael newydd arfaethedig. O ganlyniad, bydd fy swyddogion yn ceisio darparu'r dystiolaeth orau sydd ar gael a chymaint o wybodaeth ag sy'n ymarferol bosibl fel rhan o'r ymrwymiad i gynnal Asesiad Effaith Rheoleiddiol llawn ar gyfer craffu ar reoliadau'r dyfodol.

Argymhelliad 4: Mae'r Pwyllgor yn argymhell bod Llywodraeth Cymru yn egluro ei dull o fonitro ac adolygu gweithrediad Bil Caffael y Gwasanaeth Iechyd (Cymru), gan gynnwys yr amserlenni arfaethedig.

Ymateb: DERBYN

Fel y nodwyd yn y Memorandwm Esboniadol, mae Llywodraeth Cymru wedi ymrwymo i fonitro ac adolygu'r broses o weithredu'r Bil hwn, ynghyd ag effeithiau ei ddarpariaethau, yn y cyfnod ôl-gweithredu.

Nodaf argymhelliad y Pwyllgor a byddaf yn mynd ati gyda'r nod o sicrhau bod darpariaethau yn cael eu cynnwys mewn canllawiau statudol ar gyfer y gyfundrefn newydd a fydd yn monitro defnydd ac effeithiolrwydd mewn modd amserol.

Wrth lunio rheoliadau a chanllawiau statudol yn y dyfodol, bydd fy swyddogion a minnau yn ystyried y dulliau mwyaf ystyrllon o fonitro gweithrediad allbynnau'r Bil. Byddwn yn mynd ati i wneud hyn gan ystyried adborth parhaus gan randdeiliaid ar effeithiolrwydd y gyfundrefn newydd arfaethedig, a chysoni ag unrhyw newidiadau yn y dyfodol a fydd yn cael eu hysgogi gan Adran Iechyd a Gofal Cymdeithasol Llywodraeth y DU o dan ei Chyfundrefn Dethol Darparwyr.